

【经文信息】大正藏第 14 册 No. 0473

佛说妙吉祥菩萨所问大乘法螺经 1 卷

No. 473

佛说妙吉祥菩萨所问大乘法螺经

西天译经三藏、朝散大夫、试光禄卿、明教大师臣法贤奉 诏译

如是我闻：

一时佛在舍卫国普遍殿内，坐宝师子之座，与大苾刍众万二千五百人俱，复有菩萨摩诃萨，及百千缘熟所度之众。

尔时妙吉祥菩萨摩诃萨，承佛威神即从座起，偏袒右肩右膝着地，合掌顶礼而白佛言：「世尊！有大福德，云何较量？如是大福，有无量俱胝那由他百千之数，缘熟所度之众意愿欲满，云何如来为彼法螺？」

尔时世尊闻是语已，告妙吉祥菩萨言：「妙吉祥！不可思议行，大智慧、大慈大悲，是大福德。如是大福，令一切声闻、缘觉，发大方便精进、持戒愿行，成就得最上三摩地，观想一切缘熟所度之众，即是如来法螺。」

佛告妙吉祥菩萨：「所有南阎浮提一切众生，持十善法所获福德，如是较量：于彼福德积成百倍，是即一金轮王福德。而彼轮王，统四大洲，七宝具足，所谓轮宝、象宝、马宝、摩尼宝、玉女宝、主藏宝、主兵宝，复有千子，勇猛威德，色相端严，能破他军。妙吉祥！彼金轮王有如是大威力。

「复次，妙吉祥菩萨！四大洲界，所有一切众生，如是一一众生，各等一金轮王福德。于彼众生所有福德，如是较量乃至千倍，是即一帝释天主福德；如是帝释，有大威神福德之力。

「复次，妙吉祥菩萨！四大洲界所有一切众生，如是一一众生，各等一帝释福德，于彼众生所有福德，如是较量百千倍数，是即一大力那罗延天福德；如是那罗延天，有大威神福德力故。

「复次，妙吉祥菩萨！四大洲界所有一切众生，如是一一众生，各等一大力那罗延天福德，于彼众生所有福德，如是较量无数百千倍，是即一欲界他化自在天魔王福德；如是魔王宿种善根，生彼欲天，有大威力，而能调伏诸天人故。

「复次，妙吉祥菩萨！四大洲界所有一切众生，如是一一众生，各等一魔王福德，于彼众生所有福德，如是较量无数百千倍，是即一二千世界梵天福德；而彼梵天，于二千世界行慈悲化故。

「复次，妙吉祥菩萨！于二千世界所有众生，如是一一众生，各等一二千世界梵天福德，于彼所有福德，如是较量无数百千倍，是即一三千大千世界主大自在天及梵天福德；彼大自在天及梵王，于三千大千世界行慈悲化故。」

佛告妙吉祥菩萨：「汝应见此劫坏之时，大火所烧，经一中劫。尔时，大自在天及梵天王，降澍大雨，其水遍满三千大千世界，上至梵天。而此大水，即是大自在天及梵王威力所作，如是大自在天及彼梵王，种大善根，得生彼天，具智慧有大威力。

「复次，妙吉祥菩萨！所有三千大千世界一切众生，如是一一众生，各等一三千大千世界大自在天及梵王福德，于彼众生所有福德，如是较量无数百千俱胝倍，是即一大精进缘觉福德。妙吉祥！勿谓三千大千世界一切众生，皆如大梵王福德，等彼缘觉而以为多。假使十方佛刹，一切众生所有福德，等一精进缘觉犹未为多。

「复次，妙吉祥菩萨！于彼十方佛刹，一切众生所有福德，如是一一众生，各等缘觉福德，于彼众生所有福德，如是较量无数百千俱胝那由他倍，是即一初发心菩萨福德。妙吉祥！勿谓无数百千俱胝那由他倍一切众生福德，等一初发心菩萨福德，而以为多。假使十方尽虚空界，所有卵生、胎生、湿生、化生，有色、无色，有想、无想，非有想、非无想，如是一切众生所有福德，无数百千俱胝那由他倍，等一初发心菩萨，亦未为多。

「复次，妙吉祥菩萨！如是尽虚空界一切众生，各等初发心菩萨福德，如是较量无数百千俱胝那由他倍，是即如来一毛孔量福德。诸佛如来身中毛孔，各各复有九十九千细妙毛孔。妙吉祥！如是佛身一切毛孔所有福德，而以较量无数百千俱胝那由他倍，是即如来身分之一中一种好福德。如是佛身八十种好，各各具足如前福德。

「复次，妙吉祥菩萨！如来八十种好所有福德，而以较量无数百千俱胝那由他倍，是即如来手足之下相文福德之量。如是各各相文，皆有八十种好，显现手足之下。」

颂曰：

「伞盖幢吉祥，	鬘钩冠宝杖，
宝瓶象马虎，	金翅摩竭鱼，
龟鱼及孔雀，	迦陵频伽鸟，
命命佐沙鸟，	搆俱啰鸳鸯，
鸚鵡鵝鳩麥，	大药提努牛，
羖羊龙牛王，	宝山吉祥果，
播那波鹿王，	摩尼宝利剑，
金刚杵弓旗，	三叉犁钺斧，
捣杵箭胃索，	虞拏与弥伽，
梵天帝释主，	持国天水天，
广目多闻天，	大仙吉祥日，
火天月风天，	莲花万字相，
莎悉帝迦好，	訥哩嚩贤座，
镜拂憍尸迦，	童子童女天，
鼓螺蜜哩誡，	手钏及铃铎，
耳环与指环，	军拏罗罗多，
妙花王树王，	众中释师子，
如是等八十，	一一俱名好，
出现手足下。」	

佛告妙吉祥菩萨：「所有如是八十种好一切福德，如是较量无数百千俱胝那由他倍，是即如来身分之中一大丈夫相福德。如是佛身三十二大丈夫相，一一各有如前福德，于佛身中分明出现。」

颂曰：

「乌瑟膩沙相，	螺髻发紺青，
滋润而右旋，	额广而平正，
眉间白毫光，	皮肤妙柔软，
目广青莲叶，	齿密而齐整，

四十悉具足，
白类如珂雪，
上半如师子，
身形妙圆满，
身毛顺右旋，
双股俱平正，
二足下平满，
十指而纤长，
行步而直进，
善相属着身，
足下而平正，
如是大丈夫，
四牙俱锋利，
腮脸并胸臆，
舌相而广长，
如尼拘陀树，
脐轮净深隐，
两膺如鹿王，
手足俱柔软，
俱有网鞞相，
舌常得上味，
七处皆平满，
常现千辐轮，
三十二种相。」

佛告妙吉祥菩萨：「如是三十二大丈夫相，于此三十二相所有福德，而以较量阿僧祇不可思议、不可称量，无等等、不可说不可说倍数，为缘熟度众所愿圆满福德，是故如来说因缘成熟所度之众而为法螺。」

佛告妙吉祥菩萨：「所有如来妙法螺音，无量无边阿僧祇世界一切众生，悉得普闻。妙吉祥菩萨！非唯螺音如是，如来身光亦能照曜无量无边阿僧祇世界，令诸有情得见佛身，如是不可思议。」

佛告妙吉祥菩萨：「大智慧、大慈悲是大福德，一切声闻、缘觉善解愿力行，大方便，清静持戒，得最上三摩地。

「复次，妙吉祥菩萨！佛身无为离诸相故，一切声闻、缘觉及诸菩萨不能见故。如来所化色身有二种义故，一者酬于因中度生愿故，二者所度有情今缘熟故，是以如来化现色身。所现之身清静微妙，令诸众生亲近供养得大利益。

「复次，妙吉祥菩萨！佛身最上故，相好最上；相好最上故，光明最上；光明最上故，梵音最上；梵音最上故，说法最上；说法最上故，佛行最上。是故如来所现色身，令彼有情得大利益。

「复次，妙吉祥菩萨！如来身中具摄一切诸相；随诸众生根、欲、性等利钝不同，所现色身各各有异，令诸众生各得亲近，乐闻妙法，皆得度脱，乃至行住之时常得见佛。」

佛告妙吉祥菩萨：「如来具足应供。正等正觉，出现世间，慈愍有情，利益安乐无量人天诸众生故。」

尔时妙吉祥菩萨摩诃萨从座而起，偏袒右肩右膝着地，合掌向佛，顶礼世尊而白佛言：「我今快得善利。如是世尊，三界无着，最尊、最胜，利益一切众生。佛观一切世法，不动如须弥，无着如虚空，不可思、不可议，非见、非不见。」

尔时世尊说此经已，妙吉祥菩萨摩诃萨，及诸苾刍并诸菩萨摩诃萨，一切天、人、阿苏罗、嚧达哩嚧等，闻佛所说皆大欢喜，信受奉行。

佛说妙吉祥菩萨所问大乘法螺经

【经文信息】大正藏第 14 册 No. 0473 佛说妙吉祥菩萨所问大乘法螺经

【版本记录】CBETA 电子佛典 Rev. 1.11 (Big5)，完成日期：2009/05/24

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，释常谛法师提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
